



REPUBLIKA E KOSOVËS
REPUBLIKA KOSOVA - REPUBLIC OF KOSOVA

KOMISIONI I PAVARUR I MEDIAVE
NEZAVISNA KOMISIJA ZA MEDIJE
INDEPENDENT MEDIA COMMISSION



**RREGULLORE Nr. BA 2017/01
E PUNËS SË BORDIT PËR ANKESA**

Bordi për Ankesa;

Në mbështetje të nenit 42, paragrafi 2, të Ligjit Nr. 04/L-44 për Komisionin e Pavarur të Medieve, miraton këtë:

RREGULLORE Nr. BA 2017/01 E PUNËS SË BORDIT PËR ANKESA

Neni 1 Qëllimi

Me këtë Rregullore përcaktohen rregullat për organizimin, procedurat dhe vendimmarrja e Bordit për Ankesa.

Neni 2 Fushëveprimi

Kjo Rregullore zbatohet për Bordin e Ankesave si dhe palët pjesëmarrëse në procedurë.

Neni 3 Përkufizimet

1. Shprehjet e përdorura në këtë rregullore kanë kuptimin si në vijim:

1.1. **Komisioni i Pavarur i Mediave (KPM)** - organ i pavarur i cili është kompetent për rregullimin, menaxhimin dhe mbikëqyrjen e spektrit të frekuencave të transmetimit. KPM-ja rregullon të drejtat, detyrimet si dhe përgjegjësitë e personave fizik dhe juridik të cilët ofrojnë shërbimet mediale audio dhe audiovizuale;

1.2. **Bordi për Ankesa (BA)** - organ i pavarur kompetent për shqyrtimin e ankesave të palëve ndaj vendimeve të KPM-së;

1.3. **Zyra Ekzekutive (ZE)** - është sekretariat i KPM-së për zbatimin e të gjitha detyrave të përcaktuara nga BA brenda kompetencave ligjore në pajtim me Ligjin e KPM-së;

1.4. **Palët në procedurë pranë BA**- Parashtruesi ankesës dhe Përfaqësuesit e KPM-së.

2. Shprehjet tjera të përdorura në këtë rregullore kanë kuptimin e njëjtë si në Ligjin Nr. 04/L -44 për Komisionin e Pavarur të Mediave si dhe aktet tjera që e rregullojnë këtë fushë.

Neni 4 Procedura e ankimimit

1. Dorëzimi i Ankesës me dokumente mbështetëse, bëhet brenda afatit prej tridhjetë (30) ditësh nga pranimi i vendimit të KPM-së, përmes zyrës së KPM-së.

2. Ankesa duhet të përmbajë emrin dhe adresën e ankuesit, si dhe numrin dhe datën e vendimit të KPM-së. Ankesa duhet të dorëzohet dhe nënshkruhet nga Parashtruesi i Ankesës në gjuhën zyrtare.

3. Në ankesë mund të paraqitet ndonjë fakt ose argument, i cili nuk është shqyrtuar nga Komisioni gjatë marrjes së vendimit.

4. Vendimi i KPM-së atakohet për shkak të:
 - 4.1. vërtetimit të gabuar dhe jo të plotë të gjendjes faktike;
 - 4.2. aplikimit të gabuar të ligjit material;
 - 4.3. shkeljes së rregullave procedurale;
 - 4.4. sanksionit apo kushtit të vendosur.
5. Bordi për Ankesa do t'i merr parasysh vetëm ankesat e bazuara në informacione ligjërish të relevante, apo të bazuara në mundësin se ekziston gabim procedural dhe material i bërë nga ana e KPM-së gjatë marrjes së vendimit.
6. Kur paraqiten ankesat kundër vendimeve të Komisionit të Pavarur të Mediave, Bordi i Ankesave duhet të njoftohet nga shërbimi profesional administrativ i Zyrës Ekzekutive brenda tri (3) ditëve dhe të dërgohet një kopje e ankesës.
7. Kryetari i Bordit për Ankesa, në bashkëpunim me Zyrën Ekzekutive, thërret takimet e Bordit për Ankesa.
8. BA gjatë shqyrtimit të ankesës, në rast se konsideron të nevojshme, mund të ftojë palët në seancë të shqyrtimit të cilët njoftohen tre (3) ditë para mbajtjes së seancës.
9. Palët e interesuara mund të kërkojnë nga Bordi leje për prezantim në seanca.

Neni 5 Provat dhe shkresat

1. Barra e paraqitjes së provave mbi të cilat mbështetet ankesa do të bie mbi parashtruesin e ankesës.
2. Zyra Ekzekutive e KPM-së do t'i ofrojë parashtruesit të ankesës qasje, në bazë të kërkesës, në të gjitha dokumentet në dosjen e rastit të KPM-së bazuar në Ligjin për Qasjen në Dokumentet Zyrtare.
3. Me kërkesën e parashtruar, Bordi mund të pranojë dokumente me shkrim nga palët e treta të cilat kanë interes në proces. Në raste të veçanta, Bordi mund të ftojë palën e tretë që të paraqitet para Bordit.

Neni 6 Delegimi i Detyrave tek Zyra Ekzekutive

Bordi për Ankesa mund t'ia delegojë funksionet e tij Zyrës Ekzekutive të KPM-së në lidhje me pranueshmërinë e ankesave dhe materialit dëshmuar si dhe njoftimin e palëve nën mbikëqyrjen e tij.

Neni 7 Seancat dhe Gjuhët

1. Seancat para Bordit do të jenë të hapura përjashtimisht rasteve kur vendosë BA.
2. Seancat shqyrtuese do të mbahen në gjuhët zyrtare me përkthim simultant apo të vazhdueshëm, sipas nevojës.

3. Nga seanca shqyrtuese mbahet procesverbal i cili pas përfundimit të saj nënshkruhet nga të pranishmit.

Neni 8 Përfaqësimi i Palëve

1. Palët në procedurë pranë BA mund të përfaqësohen nga personat e autorizuar.

Neni 9 Rrjedha e Seancës

1. Kryetari i Bordit do të caktojë rrjedhën e seancës.
2. Kryetari e hap seancën dhe njofton të pranishmit me çështjen dhe pretendimet ankimore.
3. Cilido anëtar i Bordit, mund të parashtojë pyetje apo të kërkojë komente nga palët në procedurë lidhur me çfarëdo çështje ligjore ose faktike që ka të bëjë me procesin.
4. Bordi, mund të kërkojë prova shtesë lidhur me çfarëdo çështje, që parashtrohet nga cilado palë, gjatë procesit.
5. Bordi, sipas vendimit të vet apo sipas kërkesës së palëve në procedurë, mund të shtyj seancën për aq kohë sa konsiderohet e nevojshme.
6. Bordi, merr vendime të nevojshme për të udhëhequr procesin në mënyrë të rregullt dhe në kohë.

Neni 10 Vendimmarrja e Bordit

1. Vendimet e Bordit merren me shumicë votash, në seancën e këshillimit dhe votimit të cilën e drejton Kryetari, pasi të jetë plotësuar kushti i kuorunit, për secilin rast të veçantë.
2. Bordi me vendimin e tij mund të mbështetë, ndryshojë ose shfuqizojë çdo vendim të KPM-së duke vepruar sipas ankesës për vendimet përkatëse.
3. Vendimi i Bordit do të jetë me shkrim dhe duhet të jetë i arsyetuar.
4. Arsytimi i vendimit do të përmbajë konkluzionet e Bordit për faktet materiale, konkluzionet bazuar në ligjin në fuqi dhe vendimin e tij mbi aplikimin e ligjit në faktet e gjetura, duke pasur parasysh lirinë e gjykimin.
5. Procesverbali i këshillimit dhe votimit duhet të nënshkruhet nga të gjithë anëtarët e Bordit, si një dokument i brendshëm i Bordit. Anëtarë që është kundër mund ta shënoj votën e tij kundër. Vendimi i Bordit, me arsyetimin e plotë, duhet të lëshohet si një dokument tjetër i nënshkruar nga Kryetari i Bordit.

Neni 11
Pavarësia dhe Paanshmëria e Anëtarëve të Bordit

1. Anëtarët e Bordit për Ankesa janë të pavarur në shqyrtimin e çdo çështjeje dhe marrjen e vendimeve nga kompetenca e vet ligjore.
2. Në çdo rrethanë e cila paraqet konflikt interesi sipas ligjit në fuqi, Bordi do ta refuzojë ankesën për shqyrtim.

Neni 12
Fuqia Juridike e Vendimeve të Bordit për Ankesa

1. Vendimi do t'i dorëzohet palëve, dhe do të publikohet në njërën nga gjuhët zyrtare, në web-faqen e KPM-së.
2. Vendimet e Bordit janë përfundimtare dhe mund të atakohen në Gjykatën kompetente sipas Ligjit për Gjykatat.

Neni 13
Dispozita Përfundimtare

Me hyrjen në fuqi të kësaj Rregulloreje shfuqizohet Rregullorja e Punës së Bordit për Ankesa BA 2013/01.

Neni 14
Hyrja në Fuqi

Kjo Rregullore hyn në fuqi në ditën e nënshkrimit.



Avdyl Hyseni

Kryetari i Bordit për Ankesa

23/05/2017